

Heit hawwichs emol vom Babbbele

Also frieher, wenn derr was oigefalle iss, wassde unbedingt doiner Fraa verzähle wollst, doo hossde geward bissde dehoom warst unn dann hossdes dere verzählt. Heit iss dess onnerst, weilde joo e Händy hosst. Also greifsde in de Säckel, hollst dess Ding eraus unn rufst doi Fraa oo.

No ja, mir Äldere mache dess joo villeicht nit so oft, awwer bei de junge Leit, die merr unnerweechs sehe dut, bei dene iss dess so. Weils Babbele iss e spontan Bedürfnis so wies Wasserlosse, dess konnsde aach nit immer bis dehoom unnerdricke. Ich bin doo druffkumme, weil in so emm Lokal, was merr in Wien immer noch Pissoir nenne dut, hott ooner newer mir gestonne, hott mett der oone Hond ... no ja, unn mett der onner Hond dess Händy gehalle unn hott drufflos geschwätzt. Der hott also zwaa spontane Bedürfnisse uff oomol bewäldischt.

Weils Babbele also e spontan Bedürfnis iss und die Macher von dene Telefongesellschaft dess schunn long wisse muss merr sich nit wunnern, wenn alle paar Daach ess Telefon klinge unne e Stimm dich frooche dut, obs nit besser wär, du dest doin Tarif umstelle uff Flätträt odder wie dess heeßt, dann kennsde nämlich Daach unn Nacht telefoniern unn ess det dich außerdem noch wenicher kosde. Unn dess Internet wär aach debei, sogar wennde gar koon Kompjuder unn koon Läpptopp host.

Dess iss joo alles schee unn gut, awwer villeicht hott sich grad dorch die Telefoniererei – ooner babbelt, ooner heert zu – in de letzde John die gonz normal Unnerhaltung unner Bekonnte verännert.

Doo werrsdde zum Beispiel von oom von doim Verein uff de Gass gefroocht wie derrs gehe dut, unn wennde grad Luft gehollt host um Antwort ze gewwe, hotter sich schunn erumgedreht unn babbelt mett emm onnern.

Odder du fängst oo dich mettere weitläufisch Verwondte ze unnerhalle, erzählst dassdes omm Knie host unn schunn fängt die oo, dass sies gonz gewaldisch in de Schultern hott, wasse schunn alles degeeche gemacht hott unn was ferr deierne Pille sie nemme dut.

Aach dess bassiert: Du unnerhälst dich mit doim Freund unn dem soi Fraa unnerhält sich mett doiner Fraa. Wenn jetz doin Freund sächt: Stell derr vor, heit moie um siwwe Uhr hott so enn Kerl onn unserm Door geschellt, doo dreht sich dem soi Fraa erum unn ruft emm zu: Ess war schunn um zeh vor siwwe! Dess heeßt doch nix onnerst, als die hott doiner Fraa iwverhaupt nit zugeheert. Desde doim Freund soi Fraa awwer druff uffmerksam mache dassde grad nit sehr höflich gewese iss kennsde villeicht ze Antwort krieg, Fraue dete halt gut heern, dess aach noch in Stereo, unn sie misst immer wisse was ihrn Monn ferrn Quatsch erzählt.

Odder weilde e paar Daach fortgewese bist willsde uffem Markt emm ahle Kumpel unn soiner Fraa emol erzähle, wasde so alles geseh unn erlebt host, awwer du host noch nit richdisch oogefonge, doo werrsdde grad gefroocht wies Wetter gewese iss unn wennde sächst ess warn zwonzisch Grad kriehsde gleich verzählt, dass uff dene ihrne Reis ess iwver dreißig Grad gewese sinn, dass se Löwe unn Giraffe geseh hawwe unn dass uffem Kilimandscharo noch immer Schnee leie dut.

So Unnerhaldunge gefalle merr garnit unn deshalb waaß ich was ich demnächst mache due: Wenn ich werklich will dass merr ooner zuheert, dann nemm ichs Telefon odders Händy unn ruf enn oo. Eiern Honnes